

PORODIČNA FOTOGRAFIJA: PRIMORANA USLIKATI LISTIĆ DA DOKAŽE ODANOST RODAKU-KANDIDATU NA IZBORIMA

Posjeta rođaka na kućna vrata, sa zahtjevima, umjesto poklonima

Žensku osobu (49 godina) je pred lokalne izbore 2020. godine iznenadila posjeta njenog rođaka na kućna vrata koji je ujedno bio i kandidat za načelnika na izborima. Uručio joj je letak sa naznačenim kandidatom i brojem. Međutim, uskoro je shvatila da on ne dijeli običan materijal za predizbornu kampanju. Isprva je razgovor započeo kako su rođaci i kako bi zbog toga trebala glasati za njega dajući mu podršku kao članica njegove šire porodice. Međutim, njegovi zahtjevi su postajali sve veći, a situacija u koju ju je doveo je opisala kao izrazito nelagodnu i bezizlaznu.

Potpisivanje u rokovnik na listu sigurnih glasova za kandidata na izborima

Ubrzo je tražio listu glasova svih članova porodice njenog domaćinstva, na kojoj su njen sin, snaha, supruga i ona sama. Porodična veza sa kandidatom na izborima postala je mač sa dvije oštrice u kojoj se povinovanje činilo jedinim izlazom. Dao joj je rokovnik u koji je unijela sve podatke za svoje članove porodice koji s njom žive i na koji se potpisala.

Fotografisanje glasačkog listića kao čin odnosti rođaku-kandidatu na izborima

Bez obzira na listu koju je obezbijedila kandidatu, da bi on

uspješno orkestrirao glasove njene porodice prema njegovoj želji, kao dodatni dokaz tražio je da pri glasanju fotografišu svoj glasački listić i tako mu dokažu svoju porodičnu podršku. Na dan izbora poslala je fotografske dokaze sva četiri glasačka listića kao dokaz ispunjenog obećanja. Navodi da joj je žao koliko je bila spremna daleko otići zbog pritiska koji je vršen na nju.

Navučene lekcije i izbori 2022. godine

Nažalost, njene muke nisu završile sa Lokalnim izborima 2020. godine. Isti kandidat se ponovo pojavio za Opće izbore 2022. tražeći glasove od nje. Ovog puta, nije željela podleći pritisku prisjetivši se neugodnog iskustva sa prošlih izbora. Odlučila je da će njena porodica glasati za one kandidate za koje oni žele.

Glas na izborima koji je pokidao porodične veze

Nakon što je kandidat shvatio da je njena porodica glasala onako kako želi, a ne za njega kako je traženo od nje, te da na tom biračkom mjestu nije dobio onaj broj glasova na koji je računao, bijesno je reagovao. Iznosile su se uvrede, a odnosi među njima su narušeni. Navodi kako se suočila s verbalnim napadima te je na kraju zaključio kako je više ne smatra porodicom. Ubrzo nakon toga je bila blokirana na svim društvenim mrežama. Shvatila je koju je zapravo cijenu platila kada je odlučila da glasa za koga ona želi, ali je bila zadovoljna što nije po drugi put podlegla pritisku pred izbore. Njena otpornost je označila pomak od povinovanja ka povratku prava na slobodno glasanje.